

BH 28/02/24 ms 22

FSA menggariskan disiplin kepada subsidi aktiviti perikanan bagi menggalakkan amalan penangkapan ikan yang mampan. (Foto BERNAMA)



Ratifikasi FSA lindungi stok ikan

Malaysia tunjuk komitmen terhadap kerjasama global jaga lautan negara

Oleh Alzahrin Alias
zahrin@bh.com.my

Kuala Lumpur: Malaysia telah meratifikasikan Perjanjian Subsidi Perikanan (FSA) Pertubuhan Perdagangan Dunia (WTO), kata Menteri Pelaburan, Perdagangan

dan Industri, Tengku Datuk Seri Zafrul Abdul Aziz.

Beliau berkata, FSA itu adalah usaha global untuk membendung subsidi perikanan yang berbahaya dan melindungi stok ikan.

Katanya, Malaysia menyertai 68 ahli WTO lain yang telah berjaya meratifikasi FSA.

"Perjanjian ini adalah penting sebagai satu usaha global dalam mendisiplinkan subsidi-subsidi tertentu, demi memastikan keselamatan stok ikan dunia yang kian terancam dan semakin berkurangan.

"Dengan meratifikasi FSA, Malaysia menunjukkan komitmen kita terhadap kerjasama global dan pengurusan ber-

tanggungjawab lautan kita," katanya dalam satu kenyataan di media sosialnya hari ini.

Tengku Zafrul ketika ini menghadiri Persidangan Peringkat Menteri WTO ke-13 di Abu Dhabi, Emiriah Arab Bersatu.

Tengku Zafrul berkata, FSA menggariskan disiplin kepada subsidi aktiviti perikanan bagi menggalakkan amalan penangkapan ikan yang mampan.

Beliau berkata, ia merupakan langkah ke arah menghapuskan penangkapan ikan haram, tidak



Tengku Zafrul

dilaporkan dan tidak dikawalselia (IUU) serta menggalakkan aktiviti penangkapan ikan yang lestari dan memelihara keseimbangan ekosistem marin.

Subsidi telus

Selain itu katanya, FSA memastikan bahawa sebarang subsidi yang diberikan kepada negara anggota adalah telus dan bertanggungjawab serta membolehkan pemantauan pematuhan yang berkesan.

Perjanjian itu juga katanya mengiktiraf perbezaan negara

membangun dan kurang membangun serta menyediakan bantuan teknikal dan program pembinaan kapasiti untuk membantu negara yang memerlukan bagi mengukuhkan sistem pengurusan aktiviti perikanan mereka.

"Oleh itu, saya menggesa semua anggota WTO untuk menyertai kami dan mempercepatkan proses ratifikasi mereka bagi menyumbang kepada pemuliharaan biodiversiti marin dan mata pencarian berjuta orang yang bergantung pada hasil lautan.

"Tindakan dan komitmen kita hari ini akan memastikan masa depan anak-anak kita yang lebih cerah," katanya.